

Alles wat va AWWiet kunt dat is Lekker

Teksdichter **Edwin Peelen**
Toeëndichter **Edwin Peelen**
Oetveurend arties **45èlf**
Arrangement **Jos Gijzen**
Opnametechniek **Marlstone Music**

[koeplet ee]

Oet Belsj d'r sjokkelaat en in Italië 't ies.
'L'amour' deet zoeë vöal mieë óp jieëker' sjtroatek va Paries.
Deë oad-Romeinse-tempel vingste fraaier wie dieng vrouw.
Doe kunst alling in Lotus-sjtand nog an dieng rouw.
Mit sjteksjkes itste soep en sjpilst nog inkel jeu de boules.
Wenste al dinks aa Griekse kip sjteet dich 't water in de moel.
D'r Pruus hat dieke woeësj en in 'die Schweiz' is frisje lóch.
I Lourdes vingste dát noa woa-ste ummer has gezóch.

[refring]

Alles, alles, alles wat va wiet kunt dat is lekker.
Alles, alles, alles wat va wiet kunt dat is good.
Alles, alles, alles wat va wiet kunt dat is lekker.
Dat wat me ziet es ónbekind, weëd uëverdriëve vöal bemind.
Aal' wat va wiet kunt deed dich vruid in die gemood.

[koeplet twieë]

D'r zeëge kunt va boave. Oet 't zuude kunt de zón.
Oet Sjwede kómme al die kloëete keskes va kartón.
Mieng noabervrouw die drumt bekans al joare, dat is woar,
va inne ferme, frisje, Sjpaanse toreador.
Dat sjerpe voor oet Chili sjmakt genau noa diene zin.
Of zoeë-ing opgerolde waffel mit deë doevekóts doa d'r'in.
Nónk Sjef góng vurrig joar 'n paar daag skieje in d'r sjnei
en noom zoeë sjpritsig, jónk Tiroler-dinksjke mit noa hei.

[refring]

[tusjestuk]

't Reese rónk de welt is hütse daags nit 't probleem,
en alles liekt da beëter es wie heem.
Mar zelfs in't wietse loak nog doa besefste vreug of laat:
't sjunste wat 't gieët kunt gaar nit wiet oet eege gaat.

[refring + gesjproake teks]

Alles, alles, alles wat va wie...
*"Hei mar wach ins effe.... wat vingste da van dat zielig sjtuk riestevla mit
sjlaagroom? Of die loeënde kirkklókke op zóndigmurge? Pletskeskook? De
brónk trókt durch gen dörp? Wek mit zeem of vleesj in 't zoer? En dat
Limburgs kwarteerke of vettige nónnevótte? D'r gemuutlige Vriethof i
Mestreech of dat beer oet Gullepe of good gevólde eëpelsjlaat? Wandele
durch leëpe en Viele? En nit te vergeëte: ós gewéldige vasteloavend?"*

[refring]

Dat wat me ziet es ónbekind, weëd vöalste vöal bemind
en deed ós duchtig vruid in 't gemood.

[sjlótsjtuk]

Ichzelf zóch aa de Costa ee paar weëke mie geluk,
mar koam noa drei daag durchgebrend en leëggesjieëte truk.